



Sin buna via: La delegaziun da la partida socialdemocrata.

FOTOS G. VENZIN

Umens van, dunnas vegnan

Sandra Locher Benguerel ed Anna Giacometti èn surpraisas da l'elecziun

DAD ANDREAS CADONAU / ANR

■ **Domaduas nun han betg quintà da seser proximamain en il Cussegl naziunal. Anna Giacometti da la pld e Sandra Locher Benguerel da la ps. Ils dus cussegliers en uffizi che ston bandunar lur posts, Heinz Brand e Duri Campell, han annunzià da terminar lur carriera politica.** Duri Campell ha accentuà ch'i saja grev da vender la politica dal spectrum mez, quai tantpli sch'ins vegnia discursi mort durant biabain quatter onns. E forsa saja la vusch da Campell stada memia quieta en l'entir scenario politic. I na saja uschia che sia partida, la pbd, na fetschia nagina politica dal clima, i na saja dentant betg reussì da cuntanscher cun quella politica la massa. En general hajan tuttas candidatas e candidats da la partida burgaisdemocrata fatg memia paucas vuschs per segirar il sez en il Cussegl naziunal. E Duri Campell vegn en l'avegnir a sa concentrar sin sia lavur sco pur e manader da la atgna piazza da campadi. Fitg content cun ses resultat d'elecziun e percuter il cusseglier naziunal *Martin Candinas*. Principalmain sia lavur per las regiuns periferas e per l'en-

tir chantun Grischun saja vegnida onrada. E quai sa chapescha il pli fetg en la Surselva, sia patria, siu fundament. En la medema direziun è s'exprimi il cusseglier dals chantuns, *Martin Schmid* da la partida liberaldemocrata. Principalmain ch'i saja reussì da cuntanscher l'absolut pli en l'emprim scrutini ed uschia impedir ina secunda runda è per el fitg cuntantaivel. Visavi las bleras candidatas e candidats era per ils dus sez en il Cussegl dals chantuns saja la situaziun stada pli malsegira.

Il di ha cumenzà schlet

Sandra Locher Benguerel da sia vart nun ha quintà cun ina elecziun. Principalmain betg en vista dals emprims resultats da la dumengia suentermezdi. Tantpli gronda è sia surpraisa stada suenter ch'ils resultats da la citad da Cuira han vulvi la rangaziun e stuschà la commembra da la partida socialdemocrata en il Cussegl naziunal. Il plaschair da l'elecziun nun è stà da surveisar tar la nova cussegliera naziunala. Quai vala medemamain per la nova represchenta da la partida liberaldemocrata en il cussegl naziunal, *Anna Giacometti*. Dad in «schoc» ha la novelegida discursi vers

RTR en connex cun sia elecziun ed empermess da vulair represchentar las dunnas grischunas cun perseveranza a Berna e sa chapescha medemamain las vals grischunas da lingua taliana. Ella crai che la preschientscha mediala suenter las bovas da Bonda hajan fatg ella pli enconuschenta ed animà in ni l'auter votant ni votanta da scriver ses num sin il cedel da vuschar.

Duas varts han il di d'elecziun per la cussegliera reelegida *Magdalena Martullo-Blocher*. Dad ina vart il plaschair dal agen resultat e da la reconuschientscha da votantas e votants grischuns vers sia persuna. Schoccada è la cussegliera naziunala da la sperdita dal secund sez da la pps en enconuschientscha da la situaziun difficila da mantegnair quai sez. Tut auter che sia elecziun fiss stada ina surpraisa. *Jon Pult* vesa en las vuschs recaltgadas sco candidat per il Cussegl dals chantuns in bun resultat.

La surpraisa da betg reussir per il Cussegl dals chantuns nun è usché gronda ed il pli grond plaschair ha Pult dal success da la sanestra/verda da trametter ils proxims quatter onns dus represchentants ein il Cussegl naziunal.



Il politolog Clau Dermont analysescha ils resultats intermediars.

BILDAUTOR



Franz Sepp Caluori (pcd) en discussiun cun in'electura.



Carmelia Maissen, Marcus Caduff e Kevin Brunold da la pcd spetgan sin ils resultats.



Il rir dals victurs: Sandra Locher Benguerel (ps) e Martin Candinas (pcd).



Ruben Daniel Garbade, Géraldine Danuser, Robert Lippuner, Lorenzo Heis e Marc Andriu Carigiet da la Givvna partida verd-liberala.



Magdalena Martullo-Blocher ha cuntanschi il meglier resultat da tut ils candidats.